

२ तिमोथी

ब्रेक्ब मुर: एको चिठी पावलमी तिमोथी कली नोले ब्रेक्शो बाक्ब।

गेना ब्रेक्शो: पावलमी रोम सहरम लेंशा चोक्चा पुंइसीतीकेमी ब्रेक्शो बाक्ब।

मारदे ब्रेक्शो: पावलमी आंम पर्बम शुश ब्रेक्ब। मेकोमी तिमोथी आ थमा सुइक्तीके कली बारपाइश्शा नु गुम्तीक डा मुर यो रिम्शो सेल्चा दाक्ब। “दूली शेंब आन पर्बम होस पा बाक्कीन” दे यो लोव्र पाइब। मेको चिठी गुम्तीक कली शेंतीक बाक्ब।

डोंइती डा लोव्र

1 गो परमप्रभु यावे आ दाक्शो ख्रीस्त येसु आ सोइश्शो पावल नड। डोंइती परमप्रभु यावेमी “ख्रीस्त येसुमी गेना हना यो ब्रोंइशा बाक्तीक बाक्ब” दे आ लोव्र खाप्शो बाक्त।

2 एको चिठी आं दाक्शो तौ तिमोथी, इ कली ब्रेक्ताक्ड। इं आफ परमप्रभु यावे नु इं प्रभु येसु ख्रीस्त आस दाक्चा गे नु लील। मेको आस शिशीमी इ कली थुं नाइश्शा बाक्चा गेम्सेक्ल।

ग्येरपाइक्ब लोव्र आ पर्बम ब्रेक्शो

3 गो परमप्रभु यावे कली “गे रिम्शो पाइब बाक्नीनी” दे गेय पाइनुड। आं के किकी पिपी यो मोदेशो पशो बाक्तेक्म। आं प्रार्थनामी इ कली गेना हना यो मिम्नुड। फिलिप्पी ३:५; प्रेरित २३:१; प्रेरित २४:१६

4 गो इ डाक्शो मिम्शा, नाक्दो नाक्ती इ कली गुम्चा दे मिम्नुड। मेकोमी आं कली ग्येरपाइक्ब। २तिमोथी ४:९

5 इ रिम्शो थमा सुइक्तीके मिम्नुड। मोदेशो थमा सुइक्तीके डोंइती इ बगे लोइसमी, नोले इम्मा युनीसमी बाक्शो बाक्त। मुल थमा पा इ आगाम बाक्ब। गो मेको तुइक्नुड। प्रेरित १६:१-३

6 मोपतीके गो इ कली आं गुइ इ तारी वोदुनु, परमप्रभु यावेमी इ कली मार मार गोवा, मेको लेंशा मी खोदेशो पा ब्रपतो, दे फ्रुकपाइक्नन। १तिमोथी ४:१४

7 मारदे हना परमप्रभु यावेमी इ कली हिंब थुं मगेव। तन्न सक्ति पाइशो, दाक्पाइक्ब नु गेय पचा डोंइती मिम्पाइक्ब थुं गेप्टु। रोमी ८:१५

8 इं प्रभु आ पबर्म लोव्र पचा मुने मपावो। गो प्रभु आ पबर्म जेल्खानम बाक्शो आं पबर्म यो मुने मपावो। तन्न ग्येरपाइक्ब लोव्र आ पबर्म परमप्रभु यावे आ सक्तिमी श्येत फलो। रोमी १:१६; पत्रुस ४:१६

9 परमप्रभु यावेमी सैतान रे प्रोंइशा “आं मुर नम” दे ब्रेत्ताक्व। इं रिम्शो पतीके कोव्रशा ममाइ, आ माल्शो नु शुश डोंइती रे ख्रीस्त येसुमी इं कली गेशो दाक्तीके आ पबर्म ब्रेत्ताक्व। तीतस ३:५

10 मुल इं कली पाप रे प्रोंइब येसु ख्रीस्त कली रागीम सोइशशा, मुर नेल्ल आन कली तपाइक्तु। ख्रीस्त येसुमी बेक्तीक कली ग्राशा, ब्रोंइतीके नु गेना हना या ब्रोंइशा बाक्शा, परमप्रभु यावे आ ग्येरपाइक्ब लोव्र आ पतीकेमी छेडछेडमी वोइशो खोदेशो पा तुइक्पाइक्तु। १कोरिन्थी १५:५५-५७; हिब्रू २:१४

11 मेको ग्येरपाइक्ब लोव्र तुइक्पाइक्चा, दे गो लोव्र पाइब, ख्रीस्त आ सोइशो नु शेंब दुम्ती। १तिमोथी २:७

12 मोपतीके गो यो श्येत जाइनुड। तन्न गो मुने मपाइनुड, मारदे हना सु कली थमा सुइक्नुडा मेको तुइक्नुड। मेकोमी आं कली मबेक्डा सम्म कोव्रने चाप्ब, दे यो तुइक्नुड।

13 थमा लोव्र कली खोतो। मेको ख्रीस्त येसुमी बाक्शो थमा सुइक्तीके नु दाक्तीके बाक्ब। गे आं लोव्र रे तुइक्नेवे।

14 इं आगामी बाक्शो परमप्रभु यावे आ सोक्तीमी इ कली तुइक्पाइशो थमा शेंतीके कली खोतो।

15 नेल्ल एसीया डा मुरपुकीमी आं कली प्रोंइतीमी दे तुइक्नेवे। मेको आन दातेमी फीगेलस नु हेरमोगेनेस बाक्नीसी। २तिमोथी

४:१६

16 प्रभुमी ओनेसीफरस आ खिं डा मुर आन कली शिशी पवल। मारदे हना साडलोम पाइशशो बाक्डानु, ओनेसीफरस आं पबर्म मुने मपथु, आं कली शुश रिम्शो पाप्तु। २तिमोथी ४:१९

17 मेकोमी रोम सहर जाक्दीशशा, आं कली शुश माल्शा थित्ती।

18 प्रभुमी मेको कली आ निसाफ पतीक नाक्तीमी शिशी पवल। मेकोमी एफिसस सहरमी शुश गेय पाप्तु, दे यो तुइक्नेवे।

2

श्येत फाल्चा माल्नीम

1 आं तौ, गे ख्रीस्त येसुमी बाक्शो शिशी मिम्शा, बोल्यो दुम्शा बाक्को। एफिसी ६:१०

2 गो शुश मुर आन डोंइती इ कली नेंपाइशशो लोत्र रिम्शो थमा सुइक्ब आन कली शेंदीमी। मेकोपुकीमी यो अरु आन कली शेने चाप्नीम।

3 ख्रीस्त येसु आ रिम्शो सिपाही खोदेशो दुम्शा, श्येत फलो। २तिमोथी १:८; २तिमोथी ४:५

4 लडाइ पाइब सिपाहीपुकीमी खिं डा गेय मपाइनीम। मारदे हना आन ठेयब मुरपुकीम देशो ला पाइनीमी।

5 दोरतीक दोरबमी हेंथे पा दोरत हना, ग्राने मचाप्ब। २तिमोथी ४:८; १कोरिन्थी ९:२४-२७

6 सुमी रूम शुश गेय पाइबा, मेको आ बाली नाली आ डोंइती डा जाइब दुम्चा माल्ब।

7 आं देशो नेल्ल मिम्तो। मारदे हना प्रभुमी नेल्ल कली रुप्तीक थुं गेब।

8 येसु ख्रीस्त कली मिम्तो। मेको दाऊद आ खिं रे जाक्शा, बेक्शो रे सेंसाक्व। आं शेंशो ग्येरपाइक्ब लोत्र मेकोन बाक्ब। १कोरिन्थी १५:४,२०; रोमी १:३

९ मेको ग्येरपाइक्ब लोत्र शेंतीके, गो मरिम्शो पाइब खोदेंशो पा साडलोम पाइक्चा पुंडसीशा श्येत जाइनुड। तन्न परमप्रभु यावे आ लोत्र दा मपांडसीशो बाक्ब। फिलिप्पी १:१२-१४

१० मोपतीके गो योत्रशो मुर आन कली मिम्शा, श्येत नेल्ल फाल्नुड। मोपा मेकोपुकीमी ख्रीस्त येसुमी पाप रे प्रोंइशो दुम्शा, गेना हना यो परमप्रभु यावे आ छेडछेडमी ब्रोंइशा बाक्चा तामेक्ल। कलस्सी १:२४

११ मुरुमी मेको लोत्र कली थमा सुइक्ने चाप्नीम “गोपुकी मेको नु बेक्तय हना यो, मेको नु ब्रोंइनय। २कोरिन्थी ४:११

१२ गोपुकीमी श्येत फाल्तय हना, मेको नु हुकुम पाइनय। गोपुकीमी ‘मेको कली मतुइक्नुड’ देंतय हना, मेकोमी यो ‘मतुइक्नुड’ देंब। मत्ती १०:३३

१३ गोपुकीमी थमा सुइक्चा प्रोंइतय हना यो, मेकोमी मप्रोंइब। मारदे हना ‘गो परमप्रभु यावे आ तौ मनड’ देंने मचाप्ब” देंत। गन्ती २३:१९; भजन संग्रह ८९:३१-३४; रोमी ३:३-४; तीतस १:२

मजिचा दे शेंशो

१४ एको लोत्र मेको आन कली फ्रुकपाइक्मी। परमप्रभु यावे आ डोंइती मेको आन कली “लोत्र आ पर्वम मजिने” दे माइक्मी। मारदे हना मेको मरिम्शो दुम्ब, नेंबपुकी यो वाम ग्याम दुम्नीम। १तिमोथी ६:४; तीतस ३:९

१५ गे परमप्रभु यावे आ डोंइती रिम्शो गेय पाइब दुम्चा कली बल पावो। थमा शेंतीके रिम्शो पा शेंचा कली काइ मुने पचा ममाल्नेवे। १तिमोथी ४:६; तीतस २:७-८

१६ जाम्शा लाइब लोत्र पाइब रे डोन बाक्को। मारदे हना मेकोपुकीमी मुर आन कली परमप्रभु यावे रे डोन दुम्पाइक्नीम। १तिमोथी ४:७

१७ मेको आन लोत्र राक्शो गार खोदेंशो बाक्ब। हीमेनेयस नु फिलेतस मेको आन दातेमी बाक्नीस। १तिमोथी १:२०

18 मेको निक्शीमी थमा शेंतीक प्रोंइशा, मुर आन सेंचा नुप्शो बाकत दे शेंनीस। मोपा का निक्शी आन थमा सुइक्तीके बेकपाइक्ताकसे।

19 तन्न परमप्रभु यावे आ थमा शेंतीके मब्रेत्चा डा जग खोदेशो बाकब। प्रभुमी आ मुर आन कली तुइक्ब। मिनु प्रभु कली तुइक्ब मुरपुकी मरिम्शो पचा रे डोन बाक्चा माल्नीम। मेको थोव्रशो छाप खोदेशो बाकब। गन्ती १६:५; मती ७:२२-२३; यूहन्ना १०:१४, २७

20 ठेयब खिंमी सुन नु चांदी के बोसपुकी ला ममाइ, तन्न शी नु खप के यो बाक्नीम। का निक्शी रिम्शो गेय कली बाक्नीम, का निक्शी मरिम्शो गेय कली बाक्नीम।

21 सु आ मरिम्शो पशो शोव्रशा माफ ताइबा, मेको रिम्शो गेय डा बोस खोदेशो दुम्ब। आ होव्रप कली जिम्मा गेंसीशो नु मेको रिम्शो गेय पचा कली रिम्शो बाकब।

22 ठिटी ठिटा आन दला दाक्स रे डोन बाक्को। रिम्शो थुंमी प्रभु कली लोव्र पाइबपुकी नु गारशा, ठीक पचा, थमा सुइक्चा, दाक्चा नु थुं नाइक्चा ला मिम्तो। १तिमोथी ४:१२; १तिमोथी ६:११; हिब्रू १२:१४

23 हिक्सी मडाम्शो लोव्र पाइब नु काम मलाप्चा डा लोव्र पा जितीके रे डोन बाक्को। मेको जिचा पोक्ब ला बाक्नीम दे तुइक्नेवे। १तिमोथी ४:७

24 प्रभु आ गेय पाइबमी जिचा मदुम्ब। नेल्ल आन कली रिम्शो पाइब दुम्चा माल्ब। रुप्पाइश्शा शेंबमी मुर आन मरिम्शो पतीके फाल्चा माल्ब। तीतस १:७-९

25 जिचा पोक्ब आन कली रिम्शो लोव्रमी ठीक सेल्चा माल्ब। परमप्रभु यावेमी मेको आन कली आ गे लेप्पाइश्शा, थमा शेंतीके तुइक्पाइक्ब को?

26 सैतानमी मेको आन कली ग्याइश्शा, आ दाक्शो पपदानु, मेको रे प्रोक्मल।

3

नोले डा नाक्त दोदेशो बाक्नीम

1 नोले डा नाक्त हिंचा डा श्येत दुम्ब। गे मेको तुइक्चा माल्नेवे।
१तिमोथी ४:१

2 मारदे हना मुरपुकीमी आंम कली ला दाक्नीम। क्येट कली शुश दाक्नीम। ठेयब लेशशा, अरु नेल्ल आन कली दिप्नीम। मरिम्शो लोव्र पाइनीम। आम आफ कली मटिथु “गे रिम्शो पाइतीनी” गेनायो मर्देंथु, पापम ग्रुम्शा बाक्नीम।

3 आंम खिं डा मुर आन कली मदाक्नीम। ईख कुरनीम, मरिम्शो लोव्र पाइनीम। आंम रां नु शोव्र चलेस मजोक्नीम। जिचा पोक्नीम। रिम्शो मारेइ मदाक्नीम।

4 मुर आन कली श्येतम खुम्नीम। चुइश्शा गेय पाइनीम। “गो जोक्नुड” दे बोरशा, मुर आन लोव्र मनेनीम। आंम दला दाक्स ला पाइनीम। परमप्रभु यावे कली मदाक्नीम।

5 मोदेशो मुरुमी परमप्रभु यावे कली मिम्शा दाक्चा देंखु पाइनीम। तन्न आन आगामी सक्ति मबाक्तीके कोइनीम। मेकोपुकी नु डोन बाक्को। मती ७:१५-२१; तीतस १:१६

6 मेको आन दातेमी का निक्शीमी आन दला दाक्स पा पापम ग्रुम्शो नु आंम कली चलेस मजोक्ब मीश मुर आन खिं ओव्रशा, लोव्र नेपाइक्नीम।

7 मेको मीश मुरपुकीमी सु आन लोव्र नेतेक्म हना यो, थमा शेंतीक गेनायो रुम्ने मचाप्नीम।

8 दोपा यन्नस नु याम्ब्रेस माइश्शो मुर निक्शीमी मोसा कली “इ गेय ठीक मबाक्ब” देंसा, मोपा मेको मुरपुकीमी यो थमा शेंतीके कली “ठीक मबाक्ब” देंनीम। आन थुं मूर्ख गेयम ब्रीशो दुम्शा, थमा सुइक्तीके प्रोइशो बाक्नीम। प्रस्थान ७:११, २२

9 तन्न मोदेशो दूली शेंबपुकीमी शुश गेय पचा मताइनीम। मारदे हना यन्नस नु यम्ब्रेस आस कली खोदेशो पा, मुरपुकीमी “गशो बाक्नीम” दे तुइक्नीम।

पावल आ श्येत

10 मिनु गे आं शेंतीके, आं गेय पतीके “मार पाइनुड” दे आं मिम्तीके, आं थमा सुइक्तीके, आं फाल्तीके, आं दाक्तीके नु थमा सुइक्तीके मप्रोंइशो ताप्तीवी।

11 आं कली खेदा पशो, आं श्येत जशो यो ताप्तीवी। एन्टीओक, आइकोनीयम नु लिस्त्रा सहरमी गो दोदेशो श्येत जडा, दोपा खेदा पशो नेल्ल फलु, मेको नेल्ल ताप्तीवी। तन्न प्रभुमी मेको नेल्ल रे प्रोंइती। प्रेरित १३:१३-१४:२२; भजन संग्रह ३४:२०

12 सु सु ख्रीस्त येसुमी परमप्रभु यावे कली मिम्शा, दाक्शा ब्रोंइनीमी, मेकोपुकी खेदा पचा पुंइसीनीम। मत्ती १६:२४; प्रेरित १४:२२; १थिस्सलोनिकी ३:३

13 मरिम्शो नु ग्रांग्रा दिचा डा मुरपुकीमी “मुर आन मिक्च सिल्लीक” दे मिम्तमेनु, डोंइती डा क्येडा मरिम्शो दुम्शा, आंमान आन मिक्च सिल्ला पुंइसीनीम। १तिमोथी ४:१

परमप्रभु यावे आ लोव

14 मिनु गे मार शेंसे, मेको “ठीक बाक्ब” दे थमा सुइश्शा, पना पन बाक्को। मारदे हना गे सु नु शेंसे मेको तुइक्नेवे।

15 गे आल रे ना परमप्रभु यावे आ लोव तुइश्शो बाक्नेवे। मेको लोवमी ख्रीस्त येसु कली थमा सुइश्शा “दोपा पाप रे प्रोंइचा” दे इ कली शेंने चाप्ब। यूहन्ना ५:३९

16 परमप्रभु यावेमी मेको लोव नेल्ल गेशो बाक्त। मेको शेंचा कली, हुइक्चा कली, रिम्शो सेल्चा कली नु थमा सुइक्तीक ठीक सेल्चा कली बाक्ब। २पत्रुस १:१९-२१

17 परमप्रभु यावेमी आ मुरपुकीमी नेल्ल गेय रिम्शो पामेक्ल दे एको लोव तुइक्पाइश्शो बाक्त। १तिमोथी ६:११

4

बेक्चा सम्म थमा सुइक्चा मप्रोंइचा

1 गो इ कली ख्रीस्त येसु नु परमप्रभु यावे आस डोंइती मार देंनुड देंशा हना, येसु ख्रीस्त आ राज्य जाची ना बेक्शो नु ब्रोंइशो मुर आन कली निसाफ पाइब बाक्ब। मेको आ जाक्चा नु राज्य पचा मिम्शा १पत्रुस ४:५

2 “परमप्रभु यावे आ लोव्र पावो। नेंचा दाक्ताक्म हना यो, मदाक्ताक्म हना यो, शेंदीमी। मरिम्शो पाइब आन कली लोव्र पावो। मुर आन कली ‘ठीक पचा’ दे शेंदो। आन थुं बारपतो। नेल्ल आन कली फाल्शा, रिम्शो शेंदो। प्रेरित २०:२०,३१

3 मारदे हना इच्का नोले थमा शेंतीक नेंचा काइ मदाक्नीम। आंम दला दाक्स पा अर्को लोव्र कली नोफा दाइशशा, आंम कली शेंबपुकी तेलनीम। १तोमोथी ४:-

4 मेना थमा शेंतीक प्रोंइशा, मुर आन सेल्शो कथा नेंनीम। १तिमोथी ४:७; २थिस्सलोनिकी २:११

5 गे चहिं मार पाप्तीवी हना यो, मिम्ना मिम्न गेय पावो, श्येत फलो, ग्येरपाइक्ब लोव्र शेंदो। इ कली गेशो गेय नेल्ल पावो” दे माइक्नन। २तिमोथी २:३

6 मारदे हना गो च्देशो खोदेशो दुम्शा, आं लची ना जाक्त। फिलिप्पी २:१७

7 गो थमा सुइशशा ग्राती। दाम पशो खोदेशो पा ग्राती। थमा सुइक्चा मप्रोंइथु बाक्ती। १कोरिन्थी ९:२५; १तिमोथी ६:१२; प्रेरित २०:२४; फिलिप्पी ३:१४

8 मुल रे ठीक पतीके डा सिरपेच गुप्चा दे आं कली वोइशशो बाक्त। प्रभु ठीक निसाफ पाइब बाक्ब। मेकोमी आं कली आ नाक्तीम सिरपेच गेब। आं कली ला ममाइ, सु सुमी आ जाक्शो दाक्नीमी, मेको आन कली यो गेब। २तिमोथी २:५; १पत्रुस ५:४; याकूब १:१२; प्रकाश २:१०; मत्ती २५:२१

पावल नु आ नु गेय पाइबपुकी

9 आं कली रीब पा ग्रुम्थ जाक्को। २तिमोथी १:४

10 मारदे हना डेमासमी रागी डा गेय दाक्शा, आं कली प्रोंइती। मिनु थिस्सलोनिकी सहर लत। क्रेसेन्स गलातीया नु तीतस डाल्मातीया रागी लाम्ताक्स। कलस्सी ४:७, १०, १४

11 लूका ला गो नु बाक्ब। मर्कूस कली गे पिशशा पिवो। मारदे हना मेको आं कली वारच पाइब बाक्ब। प्रेरित १५:३७; कलस्सी ४:१०

12 तिखीकस कली एफिसस सहरम सोइक्ताक्ड। एफिसी ६:२१

13 त्रोआस सहरमी कारपस आ खिंमी फेक्तीक वा का प्रोंइता। मेको चाक्को। किताब नु कागजपुकी यो चाक्मी।

14 अलेक्जन्डर तांबा तुप्तीलमी शुश श्येत गेती। प्रभुमी मेको आ गेय तशा, सजाइ गेब। १तिमोथी १:२०

15 गे यो मेको नु होस पा बाक्को। इं शेंतीके आ पर्बम शुश जिचा पोक्तु।

16 डोंइती डा आं मुददाम सुइमी आं कली वारच मपाम। नेल्लेमी प्रोंइतीमी। परमप्रभु यावेमी मेको आन कली सजाइ मगेवल। २तिमोथी १:१५

17 तन्न प्रभु गो नु बाक्शा, अर्को रागी डा मुर आन कली परमप्रभु यावे आ लोव्र नेल्ल शेंचा सक्ति गेती। मोपा आं कली गुप्स रे प्रोंइती। प्रेरित २३:११; प्रेरित २७:२३

18 प्रभुमी आं कली आ स्वर्ग डा राज्य लचा, दे नेल्ल श्येत रे प्रोंइब। मेको कली गेना हना यो मान पय। आमेन।

नोले डा लोव्र

19 प्रिस्कीला, अक्वीला नु ओनेसीफरस आ खिं डा मुर नेल्ल आन कली “रिम्शो बाक्कीन” देनो। प्रेरित १८:२; २तिमोथी १:१६

20 इरास्तस कोरिन्थ सहरम बाक्ब। त्रोफीमस रोइ पवानु, गो मिलेटस सहरमी लाइशा वोइक्ता। प्रेरित १९:२२; प्रेरित २०:४

21 हिउंद क्येडा डोंइती आं कली ग्रुमथ रीब पा जाक्को। युबुलसमी इ कली “रिम्शो बाक्को” देशो बाक्ब। पुडेन्स, लिनस, क्लौदीया नु थमा सुइक्ब लोक्ब नेल्लेमी यो मो देंतेक्म।

22 प्रभु गे नु बाक्ल। आ शिशी गे नु लील।

परमप्रभु यावे आ लोत्र

Bible in Sunwar (NP:suz:Sunwar)

copyright © 2011 Wycliffe Bible Translators, Inc.

Language: Sunwar

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789937101646

The Bible without Deuterocanon

in Sunwar

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

27cd6a1c-0244-5add-a4e8-b4f0e5104473